

բողոքների մի երկար շարք՝ Լենինին, Չիչերինին, Օրջոնիկիձէին և «ամենքին, ամենքին, ամենքին»։ Իսկ մինչ այդ Ղարաբաղի ուղղութեամբ շարժում էին մեծ քանակութեամբ ոռուս և ազրբէջանցի զօրքեր։ Եւ երբ բոլշեիկեան ուժերը Ղարաբաղի ճակատում արդէն այնքան էին, որ կարելի էր սկսել վճռական դործողութեան, մայիս 21-ին Դրօն մօտ եկան Օրջոնիկիձէի ներկայացուցիչներ Ս. Տէր-Գաբրիէլեանը, Կայդալովը և Պերնանին և յայտարարեցին, որ խորհրդային իշխանութիւնը որոշել է գրաւել Ղարաբաղը մինչև Հաքեարի գետը։ Դրօն բողոքեց՝ յայտնելով, որ նման հարցերի համար պէտք է դիմել Հայաստանի կառավարութեան, բայց ստիպած տեղի տւեց և, մայիս 26-ին, իր էքսպեդիցիօն զօրամասով հեռացաւ Ջանգեզուր։

Հայաստանի կառավարութիւնը վճռական բողոք ուղարկեց Մոսկւա, բայց այս էլ, միւս բոլոր բողոքների պէս, մնաց անհետեանք։

Հետեանք չունեցան և Հայաստանի ու Խորհրդային Ազրբէջանի միջև սկսած բանակցութիւնները։ Յեղաշրջումից անմիջապէս յետոյ ուրիշ ներկայացուցիչների հետ ձերբակալւել էր և Հայաստանի դիւանագիտական ներկայացուցիչ Մ. Յարութիւնեանը՝ ներկայացուցչութեան բոլոր անդամների հետ միասին։ Ներկայացուցչութիւնը մատնւել էր թալանի։ Այդ, ինչպէս և Հայաստանի ու Ազրբէջանի միջև վէճի առարկայ եղող հարցերը լուծելու նպատակով՝ սկսեցին բանակցութիւններ Ազրբէջանի Յեղկոմի և Հայաստանի կառավարութեան միջև։ Բանակցութիւնները վարում էին Ազրբէջանի Յեղկոմի անդամ Հոսէյնովը և Հայաստանի Թիֆլիսի դիւանագ. ներկայացուցիչ Տ. Բէգզադեանը։ Առաջարկեց գումարել խորհրդաժողով—ազրբէջանցիք ուղում էին Բագուում, հայերը՝ Ղազախում։ Հայաստանի կողմից պատւիրակութեան անդամ նշանակւելին Մ. Յարութիւնեանը*), Տ. Բէգզադեանը, Ն. Աղբալեանը և Կ. Ղազադեանը։ Ազրբէջանի կողմից՝ նախագահ Իբրահիմ Աբալով, անդամներ՝ Լոմինաձէ և Միկոյեան։ Խորհրդաժողովի հետ կապած խնդիրները, ինչպէս և Ազրբէջանի Երևանի ներկայացուցչութեան վիճակը կարգաւորելու համար, օգոստոս 14-ին, Երևան եկաւ Ազրբէջանի Յեղկոմի ներկայացուցիչ Դովլաթեանը քարտուղար Գասպարեանի և սուրհանդակ Մորիս Ֆարրի հետ։ Աւելի չուտ լրտեսական մի խումբ էր այդ։ Ի հարկէ, այդ բանակցութիւններից էլ բան դուրս չեկաւ. Ազրբէջանի վարիչները դիտմամբ դրութիւնը թողնում էին անորոշ ու խճողած, որպէսզի աւելի հեշտութեամբ իրականացնեն իրենց «մուսաւաթական ծրագրները»։ Նրանց ջանքն էր ինչ գնով և լինի կցել Ազրբէջանին Ղարաբաղ—Ջանգեզուր—Շարուր—Նախիջևանը։ Ազրբէջանցի բոլշեիկներն էլ, մուսաւաթականների և իթթիհատականների պէս, աշխատում էին Ազրբէջանը կապել «յեղափոխական» Թիւրքիային, ինչպէս և Թիւրքերը ջանք էին թափում Ազրբէջանը պահել իրենց ազդեցութեան տակ և օգտագործել իրենց քաղաքական նպատակների համար։ Հէնց Ազրբէջանի խորհրդայնացումը թիւրքերի դործն էր։ «Կարմրացնելով» Ազրբէջանը, թիւրքերը

*) Խորհրդաժողովի առթիւ Մ. Յարութիւնեանը արձակեց բանտից։